

Grutte Pier (1480? - 28 oktober 1520) is de namme wêrûnder *Pier Gerlofs Donia* as Fryske frijheidsstrider bekend wurden is. Om syn figuer hat safolle mytefoarming west dat it slim te sizzen is hokker ferhalen op wierheid berêste en hokker net.

Libben en skiednis

Wat min-ofte-mear fêststiet is dat Pier berne waard yn Kimswert, yn de 2e helte fan de 15e ieu sa om 1480 hinne. Hy wie de soan fan Gerlof Piers Donia en Fokel Sybrants Bongma en troude mei Rintsje Syrtsema. It pear krige yn 1506 in soan, Gerlof Piers Donia. De frou fan Pier Gerlofs Donia ferstoar yn 1515.

Yn 1498 kaam Fryslân ûnder it bewâld fan Albrecht fan Saksen dy't om de problemen yn Fryslân oanpakke te kinnen, hiersoldaten nei Fryslân helle soe. Doe't dat lykwols net genôch seadden oan de dyk sette, joech dizze hearsker syn rjochten op Fryslân werom oan de Dútske keizer. Keizer Maksimiliaan I stjoerde doe de greven fan Hollân, wat ûnder oaren resultearre yn de besetting fan Starum.

Pier Donia wie boer yn Kimswert mar syn pleats, de Osinga State, waard yn 1515 troch de Saksyske hiersoldaten platbaarnd. Der wurdt sein dat doe ek syn frou fermoarde is. Dêrtroch ûntwikkele hy him ta in fûl bestrider fan Saksyske en Hollânske besetters. Under syn lieding operearre in kapersfloat ûnder de namme De Swarte Heap, fan Makkum en Warkum út op de Sudersee.

Oan Pier wurdt in reuseftich stalt en boppeminsklike krêften taskreaun. Oan Pier wurdt ek it tongbrekkerssechje "Bûter, brea en griene tsiis, wa't dat net sizze kin is gjin oprjochte Fries" taskreaun. Pier soe dat brûkt hawwe om nei te gean of de opfarrenden fan skippen wol Fries wiene. Wie dat net it gefal dan waarden se kylhelle en waard harren skip leechrôve.



Bron: Wikipedia

Stânbyld fan Grutte Pier yn Kimswert